

Val de Fascia per semper

L'Apt de Fascia à chiamà ite la radunanza generèla per aproèr l bilanz e prejentèr la ùltima novitèdes per la neva sajon da d'istà



La soracuerta del nef depliant de reclam per l'istà.

Cianacei - En mèrcol ai 6 de mé te chino Marmolèda de Cianacei se à tegnù la radunanza di sozi de l'Apt de Fascia per la prejentazion del bilanz 2008, che se à serà sù en pèr con n ùtol de 9.480 euro, con n atif total de 1.152.681 euro; 493 euro l'é la desferenza anter l valor (4.728.820 euro) e i cosc (4.728.327 euro) de produzion. Relativamenter ai cosc l'é stat sotlineà l problem de la speises che se à per l trasport turistic, desche chel per l skibus d'invern. Defat l'é stat registrà n gran smaorament de la speises per la mobilità che l'Apt à abù. Recordan che l'Apt cognessa se ocupèr e se cruzièr de promozion del turism e no de trasport publics, l president Riccardo Franceschetti à dit che ge volessa e fossa n gran aiut che la Provincia finanziasse amàncol l 30% per i trasport, descheche sozede te la provincia de Busan.

Anter i cosc se à smaorà ence la speises per l personal ajache l'é stat fat neva assunzioni percheche l'é jit en penscion jent del personèl provinzièl.

Se à osservà che del 2008 les é states mendres la entrèdes tel ciamp booking, percheche l'é stat fat manco manifestazions, però

per chel che vèrda l 2009 en generèl se à jà arjont i bogh resultac de l'andant.

L diretor Andrea Weiss à rejonà de la campagnes de reclam endrezèdes per la promozion de la Val tant a livel nazonèl che internazonèl, i strumenc duré, ence en colaborazion con Trentino Spa, Apt de Fiem e de Sèn Martin de Castrozza, l'é stat: fieres e workshop, trasmiscions televisives, radio, educational per tour operators e eductours te Val per i giornalis, apede se sà ben dut chel che l'é reclam online, sit web e

material de chèrta. Apontin l'é stat prejentà i neves depliants per l'istà e l'invern. L nef slogan l'é "Val di Fassa per sempre" per evidenzièr no demò la sfera emotiva ma la voa e l dejiderie de stèr chiò. Per fèr più intensif e vif l messaje l'é stat tout jù protagonisc del teritorie. Per ejempie su la soracuerta del depliant de l'istà l'é stat fotografà te la bela mont de Fuciade Sergio Rossi, chef fascian de gran nonzech, con ghesc che no volessa più sin jir, per sotlineèr la capazità e la braura de chi che laora sul teritorie.

Una de la costions e di ponc toché, che à gran emportanza, l'é l trend del turism de l'istà ajache se veit l smendrament di ghesc foresc, che enveze d'invern empiesenesc la val. Defati d'istà l'é più families taliènes con bec, e per chest vegn endrezà na zopa de scomenzadives per gregn e soraldut per pìcoi: Panoramapass, Fassalandia, desvaliva proponetes de vacanza. Tinùltima la gran neva de chest an l'é la classificazione di cartieres dac a fit de duta la Val, percheche vegne determinà standard e carateristiches aldò de la classificazione. (or)